

■ COLUMNA

Democrazia – dapl che mo ina maioritad

DA CLAU DERMONT

Sut la noziun «democrazia» enconuschain nus la pussaivladad dal pievel da sa participar e decider tge che schabegia en noss stadi. Democrazia è tenor Abraham Lincoln la «regenza dal pievel, tras il pievel e per il pievel». Oz viva quest'idea vivanant tar nus en Svizra: En bleras vischnancas decidan ils convischins a radunanzas communalas sur da scolas, vias e taglias, e mintga trais mais avain nus la pussaivladad da prender decisiuns davart iniziativas e referendums.

Per il solit decida la maioritad davart tut questas votaziuns. Il cas il pli extrem è ch'ina vusch decida davart gea u na, ch'ina maioritad da be 50 pertschient ed ina vusch decida sur da tschella mesadad. Era sch'il dretg democratic è accumulì tenor lescha na munta quai dentant betg ch'il princip democratic – che va in bun toc pli lunsch che be la procedura codifitgada – è cuntentà. Dal reminent, las pli grondas cuntraversas politikas èn pli probabel provocadas da decisiuns piz a cup. Uschia èn las elecziuns presidenzialas dals Stadis Unids in exempel co ina societad po sa stgarpar dapart, ma era la votaziun dals 9 da favrer 2014 cun



ina maioritad da 50,3 pertschient davart l'immigraziun da massa sparta politica e societad en Svizra anc oz, perquai che mintga pass en ina u l'autra direcziun na resguarda betg l'opiniun da la mesadad da la populaziun.

Democrazia viva da debatta

L'idea da la democrazia n'è betg ch'ina mesadad dal pievel decida davart tschella mesadad. Gist las radunanzas communalas fissan in exempel ch'ina democrazia viva da la debatta: enstagl da simplamain votar a l'urna sa radunan ils convischins en sala communalala u en halla per discutir davart lur cuminanza. La radunanza porscha a tuts la pussaivladad da s'exprimer, e la gliעד preschenta ha l'incarica da resguardar tut las vuschs per vegnir ad ina soluziun che cunvegna a l'entira populaziun, u almain ad uschè blers sco pussaivel.

Naturalmain pon els ignorar e decider cun la maioritad – ma quai procura per dispita, convischins che na salidan betg in l'auter sin via, u pli tard tar remplazzadas da l'entira suprastanza. Democrazia è sch'ins gudogna ina giada, sperda l'autra, e po acceptar che l'atgna posiziun n'è betg adina la maioritad. Sch'ina minoritad u tscherzas vuschs èn dentant adina ignoradas u schizunt excludidas da la debatta è quai in segn che la democrazia funcziuna betg. Tenor Lincoln regia uschia ina part dal pievel sur da tschella – e betg per tuts.

Integrar autras opiniuns

Democrazia munta ch'ina societad ha d'integrar tut las opiniuns, era sche quellas na cunvegnan forscha betg adina a las atgnas. Legitimaziun democratica nascha betg mo ord maioritad e proceder, mabain era da respect e toleranza vers autras opiniuns.

Quai pretenda era ch'ins na nizzegia betg la pussanza da la maioritad per sclauder autras vuschs u da far taschair la minoritad. Uschiglio èn ins tar l'extrem cuntrari: la dictatura da la maioritad.

clau.dermont@protonmail.ch